

曾忠襄公書札

曾忠襄公書札

卷之十二目錄

致何筱宋

復郭意誠

與李中堂

復李中堂

復李中堂

復王耕娛

致閻丹初

致閻丹初

致閻丹初

致閻丹初

致閻丹初

復彭雪琴

復羅訐庭

復夏子松

致葆芝岑

致羅訐庭

復張貽山

上寶中堂

致周鑑湖

復總理各國事務衙門

致閻丹初

復閻丹初

致閻丹初

致閻丹初

復閻丹初

復閻丹初

致李筱帥

致邵沐生中丞

致瑞睦菴

復陳俊丞

復李中堂

致李中堂

致李中堂

致丁樂山

復李菊圃

復唐泉伯

復勒少仲

復瑞睦菴

復楊石泉

致沈幼帥

復李中堂

復李中堂

復李中堂

復閻丹初

復閻丹初

致閻丹初

復閻丹初

復李次青

曾忠襄公書札卷十二

致何筱宋

月初奉到賜書承詳示閩中情形當卽具復一函諒已早蒙鑒及弟籌辦賑務日夕焦憂較之昔日從事東南情同勢異惟銳往之心則始終未敢稍渝而力拙時艱終恐後難爲繼貽羞隕越耳晉中書籍向不講求卽五經四書求一善本亦不可得坊間所售率多亥豕魯魚之訛而音韻學尤爲錯謬學者四聲莫辨弟到晉後早擬設立書局擇要刊刻因賑務繁興未遑兼顧今災傷未已手民歇業無以爲生因與兩司相商勉強設局旣可收養藝民藉以振興文教不敢仿南中廓大規模祇就家絃

戶誦之書量爲刊印所費尙不甚多刻已開局辦理惟紙張一項此間尤不易辦用特瀆懇台端俯賜於好善之士廣爲籌勸代購太司連官兌紙各三四百捆可以刷六經四書詩韻各五干部如此搭配購定由輪船搭解天津賑捐局以便轉解來晉應用此事本不敢遠瀆清神因三晉爲使君舊治小民感頌功德有口皆碑且昔日崇文書局及此地書院章程亦由閣下創始士林稱頌至今勿衰是以不揣冒昧備牘奉陳諒大君子樂成人美定不以遠近稍間其嘉惠之忱翹盼德音曷勝感頌如難以月籌捐款則請於賑捐項下借撥銀兩及早購辦弟於晉省提款歸完賑項兌撥清楚亦是一法悉聽訓示施行

復郭意誠

頃間接奉惠書眷注之殷溢於楮墨令人感激殊深欣悉安輿
返里僑寓星沙並擬營第鄉間以爲避賢之計高人卓見邁越
倫常從此優游杖履詩酒陶嘉享受人間清福羨何如之弟草
草勞人自慚塵俗而又處此艱危之境以至寢饋難安以視閭
下一枕羲皇實有雲泥之別鄉關南望能不依依賑務自開辦
以來幾及兩年支持不易古人以救荒無善策兄弟才拙而又
事事須仰給於鄰封能無隕越貽羞終虞覆餗今歲夏旱秋霖
重遭大祲筋疲力盡努末自嗟欲罷不能後難爲繼僅恃捐輸
涓滴之泉源而欲救三晉億萬之民命蓋亦難乎其難矣現將

清查丁賦招種荒田以及均徭減役各事宜次第舉辦明知經
畫不易然不從此時下手則雖屢獲豐年民困勢將日甚一日
又安望其能遽復元氣耶子瀚世兄隨侍回湘何時可以赴浙
前次致函筱沅方伯已得有回書矣筠老約明春可以返節昨
接合肥相國來書擬勸其坐論朝堂不識能俯允否劄剛九月
初四出都由天津上海出洋同行有松生當不寂寞

上李中堂

六月二十八日肅具寸緘諒蒙崇鑒頃接吳子健中丞來咨以
代籌晉捐欲將前捐銀兩按照新章請獎並已咨達台端請卽
核覆等因此事前於三月間接蘇省來信曾言請獎一層從前

捐資濟賑爭先恐後反不得附列優獎似未公允矚目擬截清
章程國莖以子健中丞據理而言持論極爲嚴正惟理與勢有
不能兩全者不得不通盤籌畫以期有濟晉省辦理捐輸原爲
賑務祇求來源暢旺獎敘從優所不敢惜所以部章照此定議
者並非靳從前之優獎實恐礙此後之來源蓋各省未奉新章
以前集數已多推其爭先恐後之心准照新章給獎原不爲優
此理所應然也然爲數旣多若概准按照新章則此後捐生必
設法在己集捐款內請獎斷不肯另行上兌是徒有推廣之名
而無收捐之實優獎敘反不足以廣招徠此又勢所必然者也
所關過鉅未敢輕許且聞各省已有買國捐款以備轉售移獎

者若此端一開徒飽國戶之橐無益原捐之人則新捐開如不開徒滋紛擾當經函復旋得還章健翁亦尙爲然今復備文咨商祇得仍照前議咨覆並咨呈冰案務求轉諭在事諸君查照辦理此後別省如有以此相商者亦卽一律定以限制以免捐生影射庶新捐可期踴躍不識鈞意以爲何如并垣今日復得雨二三寸稍資灌溉惟南路患旱之處甚多平陽一帶尤甚生機旣斷難以復續五夜徬徨不知所以爲計洛陽一路運事設法催趲稍有起色惟獲鹿以無長腳可覓屬聚仍多刻令赴平贊等處廣覓騾驢不知能有濟否

復李中堂

初四日肅函呈遞諒蒙崇鑒頃奉初四日鈞函敬聆種切比來
秋雨過多道路泥淖暢運爲難清卿樂山諸君子現爲代籌就
地出糶業蒙飭局通詳先儘漕米起運捐購各糧卽行糶賣晉
省糧價秋後應減南路雖無收穫而附近豫陝大熟尙不致無
糧可採將來運腳價由晉購備放賑當不至過於虧折但不識
直境變賣糧石尙易籌辦否將來此事應否先期奏明聲敘變
通辦理之法務求核示是禱平軒觀察以運事告竣遠道來晉
把晤兩次器識宏通忠愛溢於眉宇可敬可佩前懇中堂派令
幫辦天津晉捐事務乞俟平軒觀察回津後俯賜飭委無任感
禱近來各處協款日來日少而辦賑籌運用費滋繁左絀右支

時形掣肘王軍門所解十四萬金業經到此三日之間一散而空又承續集十萬金卽日起解俾應要需至深感慰直省秋霖傷稼永定河水溢隄防修葺撫綏重費蓋盡今歲風雹潦水災象重重以致各省自給不遑未能兼顧湖北江漢異漲閩中則水災風災一時並作此兩省皆以需費不暇爲晉籌款亦實情也劄剛奉 命出使此間已接其來信部置頗匪易易且重洋數萬里遲則又屆封河不得不預爲籌計道出津門必當面求訓誨尙祈示之方略錫以南針俾不辱使命則幸甚無量耳

復李中堂

八月十三日肅復一函諒登鈞鑒頃奉八月二十日惠書敬聆

種切并垣自八月二十五日起連日陰雨尙未開霽正當刈穫最忌連陰若竟浙漑不止大足爲稼穡之累至切隱憂以是糧價未落省南麥麴價反與春間相埒地產之豐嗇可知南路固須接賑卽別屬亦應辦理粥廠以養貧民若就本地產糧爲冬賑之需斷不敷用鄙意擬再爲奏請截留東漕若干趁未開河以前舟運道口登陸仍由洛陽轉輸入晉接濟南路庶子遺之民不致盡委溝壑明知運費爲難車腳難覓然察看民情實有不得不然之勢然有此一層則前書所陳在直變賣捐購各糧及閩糧萬石不便入 告在外間辦賑因獲鹿麋聚過多攜銀回晉採辦較可迅速而不知者以賣糧卽係備賑道路傳聞往

往失實應再通盤籌畫以期妥善伏求中堂代爲裁奪詳示俾有遵循粵局所請七釐經費已蒙核定不令分解津局自可有益賑捐他省如有以此爲請者卽當遵辦捐案改咨爲奏係爲嚴杜流弊乃農部因改獎移獎歸奏無詞議駁遂請展三月之限以爲騰挪地步近日之事類多如此良可慨也然三月後無可設法積弊旣除新捐自可稍暢南雲方伯所部到獲鹿後稍資休息昨南雲單騎來省已與商定分紮地段專顧北路不日卽可開拔不令幫辦糧運樹軍則分紮於省南南北分防可免顧此失彼之患惟籌辦餉需固大難事祇得俟明歲麥收之後再行酌量去留國荃與華潭中丞所處時勢各有不同各有爲

難之處設使華翁處之應亦哀鳴百叩於鄰封呼籲十上於堂陛也

復王耕娛

國荃晉陽承乏無補時艱祇以大禮流行瘡痍滿目支持日久本有予手拮据之艱滿望今歲豐收則玉粒金穰隨處多有不必謀自遠方雖民困未能遽蘇而措施較易爲力不意竟以夏旱再見恆陽芄茂秋禾不旬日間悉成黃萎民間疊遭饑饉病骨僅支勉強力田凡牛具人工皆較往歲爲費一旦遭此情何以堪其最甚者莫過省南平蒲解絳四屬是以奏請蠲免錢糧別屬地勢近北節候稍遲尙可補救一二而又疊逢秋雨旱潦

不時收穫登場米粒多帶黑色以是糧價仍未減落則地產之
豐嗇可知矣省南向種麥田不得不寬籌籽種以望來年腹地
迤北雖豐歉尙難預期而此數月中賑務繁興斷難停輟隆冬
一屆啼號之慘必更甚於此時尤不得不廣設粥廠以拯殘黎
小民之墊隘無窮公府之帑藏有限國荃仔肩本弱而日久支
撐弩末自嗟以致日夜憂惶惟恐貽羞隕越素蒙垂愛用敢瀆
陳尙望有以策我幸甚幸甚

致閻丹初

十三日奉呈四十七號書諒蒙鑒及頃奉三十四號惠函拜誦
之餘良深欣慰我公體候不適近日定已勝常至深系念省中

自重陽得雪之後迄未大霽陰寒中人多致感冒聞之北路來人雪較深厚禾稼受傷可知南路則又在患旱節近過寒露麥未能種殊切焦憂聞過社十餘日後無滂沱之雨麥卽誤期但不識初八九等日曾得雨澤否念念若今年冬麥未能下種明歲田功又無可望則此後諸事幾無著手處矣捐買牛馬之舉委員業已啟程將來分給各州縣卽嚴定章程恐亦難以周備容俟委員稟復至日再行奉商直豫苦水道口之糧本可報竣因德州尾批以水漲橋低未能速到在陸路者亦以積潦停運延閣月餘獲鹿運務近日愈形擁滯一以腳少一以山漲不免又增耗費耳薛雲階廉訪展緩入 覲已奉 俞允當經轉行

知照粒生館事承允先容弟處亦曾函致尙未接有覆書弟自愧腕弱寫不成書迺蒙嘉許益增顏汗篋中尙有宣紙容檢出畫烏絲欄塗就卽當呈政惟布鼓雷門不足當大方家一噓耳

致閻丹初

昨於十七日遞復寸函諒登丙照頃接三十七號惠書並承寄還疏稿所簽尤徵縝密已添敘照繕下次隨月摺拜發吉榮之案奉書後當卽會商仍交承審諸君細爲推鞠務期至當此係晉中近日一篇大文字中外皆以爲言要不可以不慎也南路重陽之雨大而且普藉以樹麥來歲當有可望一年之中祇爲晴雨二字費卻許多憂思此番得澤南路爲兩省以北爲雪仍

是憂喜參半前次請截漕發帑一疏未嘗不轉輾日久良以此
番晉災如人生大病不於此時盡力療治將來病除氣弱終成
羸瘠之症是以連請蠲下忙及歷年民欠及展賑各摺會列台
銜一並由驛拜發今日奉到 恩旨准如所請我 朝軫念民
依邁越前古而 皇仁稠疊至渥極優環誦 綸言令人感泣
特先恭錄一通奉呈台覽汝州存糧尙有二萬餘腳少運遲自
難求速潘令聞將回省尙未到城或其丁憂未久不便出門來
見也菊圃太史果毅之氣令人可佩各書已閱後當奉繳道口
糧運因德州尾批未竣尙未撤局今續撥東漕自應分走道口
則此局仍應接續辦理現已咨請東省提前趕辦不識能做得

到否汪柳門司成奏請將各局存糧糶賣奉 廷旨飭與我公暨合肥相國籌商昨接爵相函牘以糧米無人承受且晉中如此光景亦不便於變價擬仍設法挽運以濟民窮將來卽以此意覆奏不識尊意以爲何如永濟洪令調署陵川其地小而易治調署永濟者爲嵐縣李令榮和其人是誠樸一路當能勝此繁劇此外應商各事統容隨後布達

致閻丹初

二十五日發五十號書昨今兩日連奉三十九四十號賜函祇承種切南路晴雨不時致稽樹麥但不識近已大霽否省中情形相同二十五夜雨澈旦途多積水以致米炭皆昂急盼晴朗

運路暢則糧價可望減落東漕須派員赴彼催運尙未選派得
人大約走道口館陶獲鹿三路從東陽清化翼城分途入境俟
商定再行詳達雲階廉訪晉謁台端後已啟程來省雨後泥淖
恐未能按程進發耳承示訐翁諸君均有人都之意現在賑務
未竣諸資贊畫鄙意應俟濟賑後再行辦理惟思明歲爲考差
之年向例年內回京方准與考似指請假離署者而言若奉差
在外與告假不同或不必定拘向例如菊圃太史必欲考差不
便延誤應可緩至年外再行北上統望就近商榷示知以便遵
辦訐翁杏樵二位旣非京員更可不必急急也書局先刻四書
次刻六經先擬仿山東丁稚翁刊本其餘尙未求得善本茲承

寄書曰極好請將單內鄴架所藏十月附便寄來以便接續發刻四書多刻一部不妨將來頒發郡縣專用一板必致模糊書局定章如有善本發刻核對既定將來卽以初捐數部奉酬仍以原書奉繳定議繕寫宋字雖費工力稍稽時日不敢畏難也但舊本難得人多寶貴不肯公諸同好如我公之大道爲公者天下能有幾人哉通鑑並歸省局刊刻亦似不必再由運城另設一局也方望浮先生尙書述稿本亦祈賜寄容卽選人督繕以樣本呈政後再行付刻何如王文成客坐私祝已奉到容錄就再行呈教

致閻丹初

二十六二十八日兩次發信奉陳種切諒登惠照省中近日晴
朗氣候亦覺稍和弟小病數日刻已痊可因憶尙有應商之事
謹爲條布

一道口尾批之糧將次報竣轉運洛陽必速洛陽各局亦將蕝
事新撥東漕擬由道口館陶獲鹿三路行走洛陽一帶可否分
走少許以分三路之力冬春腳力較多且豫獲豐收情形似有
起色尙求我公就近察看究竟鐵謝局能否分運若干卽祈示
悉如該局尙須接運新漕舊糧雖竣亦未便遽行裁撤

一新漕運費擬卽派員赴京承領部款二十萬金不敷尙多現
已分函催取協款及捐輸銀兩不識能應急否捐輸展緩一年

亦請各省酌定需照數目先行請發以免臨時局促運城自開局後不識捐務如何亦祈面諭張丞察看情形將此一年內應需之照先爲約定以便隨同省局一並請頒同善之銀尙存若干能延至明年乃完可否祈示知

一南路樹麥雖發種銀究難徧及聞麥價獨貴荒地又多不識民間尙有能自謀者否此番得雨後種者約有幾成此事關明歲收成轉機在此極爲緊要不能忘懷務求便中示及以慰懸系

一省南牲畜旣無遺類大有妨於農功將來口外採辦牛馬進口必當趕緊運往散放須有定章細思尙無善法弟現飭局妥

擬斟酌既定再行承教尙求我公督飭玉山諸君亦爲酌擬庶彼此參酌較可周密

一汝州糧運近日應有起色農事旣間腳力必暢不識現已運到若干尙存若干北舞所存七八兩批之糧前奉大牘知已飭令照舊接收如訐庭先生以汝局存糧尙多應俟開運再行接管竊恐糧駐河干日久囤積易致霉變且晉省現當缺糧之際若能多運亦不必定行變價務求函致訐翁早日接收曬晾接續運濟是要此間糧價大米每市斗仍在二千以外小米一千七八百文麥亦至今未大減價糧乏可知貧民謀生更難爲之一慨餘容續陳

致閩丹初

十四日遞五十五號書頃奉四十二號惠示知五十四號以前各信均蒙鑒及我公節次違和殊深系念而來書娓娓數千言精神周匝弟愧弗能及拜誦迴環至深佩服諸事謹爲條復

一五路分運之議定其大概垣曲一路河路旣險山路復僻已委新任絳縣劉令斌前往查明卽令就近稟明台端若此路不行祇能仍走洛陽一路洛陽車馬萬難且事在隔境又多偷漏之弊應卽變計日卿玉山所詳俱係實情但所謂兩便之法以平蒲解絳各屬發給東漕折色由陝豫附近地方購運商之替舫雲階靜菴諸君咸以咨商山東請解折色其中旣多曲折斷

做不到則折色款無所出且令民間購糧境外亦必運而後來
豫境之最近者莫如會興而會興糧運亦復不易若數十州縣
同時在彼辦糧同時在彼籌運勢必腳少糧昂從前之難祇腳
少今益以辦糧之難是兩難矣若不發米而發款不必計其難
易悉聽民自爲謀原屬至簡至便之法然求 朝廷截漕
則易發帑則難東省旣難通融別處又無法想是發折色一層
亦斷做不到也惟有仍照前議設法籌運以濟地利之窮現與
諸君商明不若遵我公所議入清化運翼城之法尙能辦到惟
專恃此一路亦必壅滯難行擬改以四萬石運清化分一萬石
出翼城以四萬石運東陽關分一萬石取道屯畱之良馬出洪

洞之曲亭徑達平陽此路係潞安鹽路與翼城至澤相等刻已行文飭查矣以四萬石運獲鹿分一萬石達南路專濟蒲解兩屬仍符原撥三萬之數然後再於距聞喜縣八十里之地名北相設一總局專收蒲解兩屬賑糧鐵謝局可撤或卽移設於北相委員中有可用者畱之不得力者換之陳紳桂芬在可畱之列如夾袋有人卽請就近揀派仍候示下施行

一北相設局爲行鹽大路該處有空屋大廟可以儲糧東距翼城北距平陽南距蒲州均三四站至夏縣尤近平陸芮城亦不甚遠仍飭兩屬州縣赴局領運按程途遠近發給腳價

一翼城各局運費由省籌發北相局費以及至各州縣腳價由

我公撥給應發糧數亦請我公分派同善堂既可得十萬金道庫亦可籌十萬金或畱爲運費或先撥爲冬賑之用均無不可卓黼侯之詳已到比已敘奏矣此外如有不敷仍當設法籌解總之此事無善策祇能耐心做去務求我公勿過焦慮以慰萬民之望是所至禱

一東漕趕辦卽使年內開運亦斷趕不上冬賑之用南路所需不能專待新漕昨捐輸局具詳已預撥蘇漕四千石解至平陽聽候指撥此後續有來者仍當隨時接濟總使饑民得食不必截分新舊也

一部款二十萬金現已派員往領本擬分解河東因獲鹿德州

道口蘇曹每處各須發運費數萬金尙在不敷此款目下難以多分至節轅之實在情形也然亦必勻出二三萬金呈解行轅聽候指撥其腹地各分局運費尙無所出須待外省之捐款到日勻撥以濟要需合並附陳

一承開示糧價已悉本省糧少就近採辦仍是奪民之食以濟民外省朝邑會興價相等多買必漲且亦非運不可總不能逃此一難也

一玉山所開運路恐不易行已飭局查之矣

一鐵謝局舊糧報竣卽請裁撤將來北相設局俟糧抵清化再行舉辦以節浮費但求我公預爲選定一人委員如揭令者恐

不甚得力陳丞桂芬尙無習氣或尙可靠但不識小委員中有可用者否

一許庭先生臨行曾有信來比覆書挽留追之無及徒深悵結汝局以雨阻來者頗少現發去駱駝當較踴躍短糧過多嚴札飭辦或再咨豫省大吏飭追似較得力聞道口至鐵謝一路短交亦多將來又費一番手腳爲之奈何

一趙守尙未來省當詢小委員自該處回者或云其中途患病八九月間未知愈否如其來省仍當飭回運銷差此間尙未接其啟程之稟

一凡人之嗜烟猶患瘡毒極思療治但弟本非良醫而又當元

氣大傷之後不敢遽用峻削之劑故深佩我公正大之論而弟則心有餘而力太絀亦才氣使然也膏釐創自英香翁刻已行局調查原案卽當通飭州縣一律裁去以免藉口至坐賈行商均抽外來藥稅總恐有礙京城洋藥稅大局弟實不敢陳奏發此大難之端前信已詳爲奉達明公以道義勗我是厚待於弟也弟非懵懵豈不深知感激但能勉從者無不勉從力量實不能及者亦必直言奉復或公以孺子雖不可教而直道不泯尙有一長足取若委曲應順而言從行違是大負明公教我之心矣統乞見諒是禱

一拙書甫寄卽蒙賜書楹聯拋磚得玉欣幸萬狀求連經書刊

本速爲惠寄俾得先覩爲快

一新派武弁卽請畱備驅策近來氣候極寒且日日北風弟腴理不密時有感冒幸氣痛數日未發差可勉強支持

復彭雪琴

頃奉湖口途次報章雒誦之餘覺厚意深情令人感佩不置晉民向以貿易爲生不善儲積偶有荒歉十室九空全恃外來之糧爲接濟迨逢大侵本境苦無存糧鄰省復同遭旱患糧源愈遠轉運愈難且四面環山不通舟楫挽輸益形喫力故費錢多而得益少弟膺此艱鉅竭蹶不遑徧小之區人才兩絀殊覺措手無從當去年辦賑之初深恐委員滋弊則上負國恩下殘

民命是以定章凡放賑等事由地方官選派公正紳耆設局辦理使互相稽察有犯必懲復會同丹初星使奏調在籍紳士多人週歷各縣嚴密稽查春間經弟查出吉州段牧榮河王令兩處藉賑營私奏請革職拏問 廷旨頗爲嚴切官吏咸知儆懼但舉此大事災區過廣頭緒過繁一人之耳目難周倍深凜凜辱承忠告得聞讜言非愛我情深不克臻此感銘肺腑永矢弗諉自當隨地畱心愼之又愼以期實惠及民至委員視辦賑爲美差一層則尙不至如此緣晉省候補官場不比南省固無賢能特出之人亦無桀驁不馴之習統府廳州縣各班本僅二百餘人自遭災後不數月間病故者正佐教職已逾百二十餘員

多半歿於差次率皆無以爲殮以致柩眷畱滯未能遽賦招魂
生前之行止尙易淹藏身後之情形斷難捏飾厯厯考證因而
知之然賢否不齊未可概論固不敢盡以不肖之心待人亦不
敢竟以自信不疑處己更當擇人而任隨時切查一有弊端卽
行參撤庶足以對我直友而問心亦可稍安矣此間四月得雨
爲時已遲差幸兩月來風雨調和雖種殖無多而已治之田禾
苗暢發大有生機詎入伏後恆暘再見酷日薰蒸禾將就萎昨
日始得陣雨二三寸略可支撐一時如續霈甘霖秋收乃有可
望耳

復羅訐庭

六月十六日泐復寸函不知已登雅照否頃披手翰過辱關垂
莫名感篆汝州糧運得槃才經營擘畫俾利轉輸適當農事稍
閒車腳自較暢旺至存儲之議非到運事萬分爲難不肯出此
河東一帶又形旱象時事大爲可憂多運一石之糧卽可救數
民之命糧爲至寶不可忽也尙祈查催趲運以拯災黎是禱糧
石沿途偷漏地方官不能嚴爲緝拏足見隔省辦事之難然此
等事件恐無窩固可究而車戶率多窮苦若概從嚴辦又恐裹
足不前自宜放鬆一步但不必明定章程使知有恩可邀肆行
無忌想智珠在抱定能措置咸宜也趙守辦事乖方應買不買
應停不停尤爲可詫予以重咎實無可辭丹初星使就事論事

不得不雷厲風行從嚴參辦正欲使知所悛改以勵其餘惟弟
竊觀趙守平日爲人謹飭自守德優於才丹翁星使亦以其樸
實耐勞因而委任此番因循遲誤或由才短所致如果出於無
心則弟與閣下自應於丹初星使前爲之緩頰所望鼎力成全
以赦無心之過想亦大君子所樂爲也當此用人之際不得不
原情以棄瑕萬一操之過急求之稍苛各局人員羣有畏蒞之
念各懷觀望之情擔遲而不敢擔錯懼賠累而不肯踴躍承運
民命更危公事更滯至後起糧運兩批駁令變價交銀自是正
辦惟有此一番曲折恐公私俱受其病且近來平陽一帶大形
亢旱生機復斷不可再續弟以是日夜憂惶不知所以爲計萬

一轉瞬糧價增昂又須設法採辦不如此時多存數石之米亦足備一隅之荒如能設法運回卽請台端忍辱負重通融接收以爲日後之備閣下顧念時艱定已體驗及此毋煩弟瑣瑣贅述也臨汾蔣令所稟甚爲詳盡初意事有轉機則善後諸端卽可次第舉辦不期恆暘再見旱象又成益令人難以措手耳

復夏子松

七月二十三日奉到惠書暨銀百兩當卽轉寄襄垣並專函奉復諒達典籤頃間載奉瑤章辱承關愛銘感無窮栽種罌粟爲害滋深前次具摺詳陳亟思禁革惟法輕則民易犯利重則人爭趨雖經三令五申而暗長潛滋之弊恐仍不免從前州縣竟

有藉此營利私收畝稅者自申禁令之後此弊已除然充其量
官之失察者例止罰俸民之違禁者罪止杖八十欲執此以挽
既倒之狂瀾斷難操券竊嘗於籌賑焦憂之餘兀坐苦思冀得
良法是以前月有仿照兩江罰地充公之奏頃聞恭閱邸鈔因
左爵相奏查禁罌粟出力不力人員分別勸懲欽奉 諭旨飭
各省仿辦遵當切實奉行庶官畏効參民懼罰地官民交儆辦
理較有把握李菊圃太史經弟與丹初先生商請周厯災區並
隨地查察罌粟馳驅南北備著勤勞三月間來省接晤代創疏
稿囑裁藥釐藥釐收數在晉省每年不過五六萬金亦何所吝
惜但各省餉項多恃此爲大宗未便以晉省一隅牽動全局且

有中外交涉之款所以未敢冒昧率陳况晉省當災祲之餘幾至無款不搜若舉現有之款而裁之既無以覆大部索餉之文亦無以催鄰省協借之款爲患太切措詞尤難此弟之苦心是以未能遽應菊圃太史之請所堪深自愧怍者也辱承忠告用敢縷陳此閭忽雨忽晴未能應候南路一帶秋災已成業將平蒲解絳四屬錢糧由驛奏請蠲免北路秋禾雖茂但恐霜信過早收成亦無把握應俟察看情形再行續報災荒未已賑務難停日久支持款無所出本省之畱支各營之餉項更無論矣近今各省捐協諸款日來日少南洋經費雖稱數百萬然層層扣撥之外解者無多前經幼丹制軍奏明以五成之半解晉半載

以來解到者僅山海關上海粵海關海數處合計不及萬金其餘各處屢經函促嗣接回書均難實靠財賦之細幾於天下同然可勝浩歎秋冬之間賑款勢將不繼本省正賦既蠲尙須另行設法奏請 恩旨弟謬膺艱鉅日坐愁城自愧迂庸無所補救所望箴言時錫俾有遵循是則私衷所至盼者也致菊圃太史一函已由驛轉遞矣

致葆芝岑

弟晉陽承乏莫補時艱滿望豐收藉藏鳩拙迺自入夏後時而患旱時而患潦以致高原下隰一律受傷霍山以北節候較遲本可稍資補救不料重陽雨雪徧境成災小民殘喘餘生力田

不易一旦重遭此阨情更可憫轉瞬交冬則啼饑號寒之聲必更甚於去歲而賑施之法以進款過絀大有弩末窮縞之勢本境旣一無可謀鄰省不知此間細情或謂事有轉機竟亦未能分潤則此數月中勢成坐困不得已將實在苦情臚列陳告幸蒙 天恩准畱東漕十二萬石部款二十萬金 聖明軫念災黎 恩澤極爲優渥 綸音下賁萬姓歡呼三晉子遺從此可望生路惟晉省辦賑之難以運糧爲最緣四面皆山不通舟楫牲畜倒斃腳力難籌本境旣無地產不得不求諸遠方覓腳馱米入山卽腳價一項已較平時米價昂至數倍此晉省地利之遠不如豫也竭蹶情形多由於此現在派員赴山東催運如能

趁未封河以前舟運道口可省出數站陸路盤費若爲時過遲則所費益不資矣刻已致函各省催欠解協借各款並捐輸以充運費尙不識能應期否平蒲解絳四屬錢糧先請蠲免嗣又查出十六州縣接續請蠲其遭災稍輕者則減成徵收其二十處均奉 恩旨刊刻謄黃頒發近幸湘勇抵境分紮北防地方尙稱靜謐大青山後及北路一帶時有馬賊滋擾飄忽靡常有此兵力足資鎮懾如今春之饑饉與軍旅交乘兵力薄弱幾令人無從著手痛定思痛不敢不作補牢之計近日雨澤過多秋禾傷損而南路藉可樹麥來歲若得麥收豐稔亦一大轉機也薛雲階廉訪刻已渡河小陽初間可以來省受篆台從抵都後

皇朝通志卷一百一十二
三
晤政府諸公乞將晉中近情詳爲道達榮旌約何時可以臨莅
翹盼殊殷尙祈先爲示及是禱

致羅訏庭

自八月間奉書後嗣以瑣務冗雜遂致一紙魚書久未塵聽歉
也何如秋來苦雨運路泥淖而豫中農事方殷腳力難覓閣下
多方籌措解濟源源具見槃才擘畫佩慰良深晉中旱潦不時
已傷稼穡尙不至全境無收自重陽雨雪後近省及北路一帶
亦皆告荒米糧騰漲一年之望如此令人悄然比來民間啼號
之慘無異去年而賑施之難則較去年爲甚不得不會同星使
披瀝上陳幸蒙 聖恩截漕發帑稠疊 隆施曠古未有 綸

言宣播萬姓歡呼然晉省轉運艱難限於地勢此項糧石到晉
又不知須費卻幾多氣力磨卻幾多月日惟本境旣無地利可
資非如此無以活民故不敢畏難而作苟安之想也汝局存糧
現尙若干邇來運腳能稍暢否七八兩批糧石前經函布台端
想已接收清楚若任舟駐河干必多耗折刻當晉省需糧之際
統望閣下接收速運聞豫州糧價大賤出售殊不上算有法挽
運總以先儘起運爲是費錢雖多可資民食荒年之穀勝於財
帛先生念切民依早已體念及此弟以今歲情形如此不得不
作來歲之望是以與星使商明廣發麥種俾資樹藝秋雨足麥
易蟠根切望布滿町畦以收桑榆之效其清查荒地之法已嚴

飭照尊議辦理多有具覆者他日倘能辦好則小民受我公之惠無窮矣

復張貽山

前奉手書當經一一具復頃間復奉惠翰晉中初患夏旱秋霖已覺有妨稼穡尙不致全境無收不料重陽雨雪爲從來所未有而又沉陰十餘日淅瀝不止秋禾之登場棲畝者一律受傷殆所謂屋漏更遭連夜雨殘喘餘生何以堪此弟自慚涼德不克上返和甘而目覩小民墊隘無窮難安寢饋凡此危殆情形不得不臚列上陳欽奉 聖恩准畱東漕十二萬石部款二十萬金又續請將徐溝等十六州縣下忙蠲免並陽曲等二十廳

州縣下忙減成徵收其通省歷年民欠概請豁免均蒙 恩旨
俞允 朝廷恩澤極優邁越前古 綸音下賁感頌同聲刻擬
趕運東漕而道遠費繁款尙無出將來惟恃捐輸爲大宗前次
奏請展緩一年亦已備牘知會惟執照約需若干務求會同在
事諸君預爲酌定徑詳督憲咨部頒發以免臨時爲難至前由
川徑請及由晉代請各照因日久未發當函懇津局轉託京友
招呼據云九月內必可發出不識此時已頒到否念念各處協
濟皆以款絀並聞晉中得雨未能應時籌解大祲之後斷非一
雨所能挽救而事關隔省率皆自願不暇日久求人終非長策
是以弟於辦賑之時無事不注力於日後蓋培養得一分民氣

將來即可收無窮之益若祇顧目前恐晉省民氣終成疲弱之症一蹶不能復振則貽害匪淺閣下體念時艱關懷桑梓當不以弟言爲河漢也種麥墾荒諸事現已次第辦理而南路牲畜幾無遺類有礙農功亦經派員赴口外採辦勸捐暨奏請將各州縣牲畜稅暫免凡此數者豈僅爲目前計哉以是用款稍繁倘冬春之間得以勉力支持明歲麥收得一豐稔則諸事可以就理矣捐項又承續籌二萬金稍遲到晉但能趕年關之用亦無不可也

上寶中堂

前呈寸函諒蒙崇鑒國荃深慚樗質徒益薪勞自晉中大祲流

行固已補苴乏術不料災荒未已年復一年竭蹶情形日甚一日秋收無望地利難資小民殘喘餘生又將委填溝壑幸蒙聖明洞察截畱東漕並指撥部庫銀二十萬兩 皇仁稠疊曠古未聞凡在臣民同深感泣晉省辦賑之難以糧運爲最萬山重遞旣無舟運可資而民間牲畜早空腳力難寬且謀諸鄰省道遠費繁非出重資終難集事其承運東漕之費惟恃貴庫發款爲大宗其開辦經費悉藉此款應用不敷之數惟指捐輸尙須廣爲設法捐借乃可有濟現經派委候補直隸州知州李嘉謨候補通判善徵持文趨叩崇階務求垂念晉民待哺嗷嗷轉致當事諸君子迅賜早日撥發感頌靡涯此次奉撥東漕遵

諭旨於年內趕運完竣刻下已派員赴東承領而運費所需專待此款倘該委員等得以早日領解啟行即可趕運漕糧以資民食大君子胞與爲懷當能拯此災黎恃愛瀆陳曷勝翹盼

致周鑑湖

頃奉環章辱承關愛殷拳至深感泐此間重遭荒旱仰蒙 聖恩撥帑截漕 逾格仁施曠古無匹小民固已共慶再生卽闔境官僚亦無不仰頌 聖德鼓舞歡欣樂於從事刻已派員前赴山東領運務期年內開幫俾資接濟惟近以荒歉車馬極難運費所短甚鉅尙須廣爲設法此弟與丹初先生所日夜躊躇者耳新募之軍已到卽令分紮包頭一帶以固北防近日據報

有零星游匪在大青山後滋擾有此兵力足資鎮懾樹軍分紮南路因欠餉過鉅急切無此力量未能遽裁現將綠營練兵次第裁去十二月可以全行撤練歸伍並定議將樹軍冬底遣撤一二成明春撤一二成夏間撤一二成秋間全行凱撤餉力方能辦到且暗中陸續裁汰資遣歸農亦不致貽後累蓋大禘之後民氣凋殘尤不能不慎之又慎以靜地方此近日變通辦理情形未敢遽以入告大約至明歲秋間方能一律辦竣也因素蒙關愛用敢縷陳

復總理各國事務衙門

頃奉鈞函以誤徵稅銀一案現准少荃中堂飭據津滬兩關道

議覆應於產貨之區責成收貨行店於洋商到該處買土貨之時無論洋商自辦或華商代辦均由該行店報驗換照如無報單照常徵稅並應取具切結飭卽照此試辦等因查晉省產貨之處無多惟口外向有洋商來買貨物亦不多見旣經明定章程自易遵守現已函飭歸綏道照章試辦如有前項事件務須慎密稽查期於稅務有裨亦不可別滋轆轤惟其中弊竇究難盡除現蒙照議飭由各海關將運到之貨與出口之貨互相稽核隨時由請單之洋商追問則影射包庇之弊可除益臻周密
欣佩良深

致閩丹初

昨日遞五十六號書詳陳種切計日當可登覽頃接山東文式
巖中丞書言東漕於奉 旨後業爲轉飭趕辦年內雖未能掃
數總可得半之道盛情極爲可感特將原函附呈台鑒許庭先
生自滎澤來書因濟河大受風濤之險卽勒馬梁園與子和制
府閩仙中丞小作盤桓並以此時不克致函囑爲道達原書附
呈弟前已致書挽留深悵追之無及今旣小住梁園復馳函奉
懇返旆不識肯俯允否此老廉介絕俗其遠行高蹈有非常情
所能牽絆者益令人傾慕不置尙祈致函慰留是禱黼侯來牘
求退前已批答畱之今接來書仍請派員接署葆方伯刻已到
京年內當可到任河東一席不必更多一番接替已囑黼侯安

心調攝勿再遽萌退志此次晉災得各省之力居多在事出力人員若不從優給獎不足以示鼓勵當會列台銜奏請援照海運河工人員核獎奉 旨明發照議准行現已備牘分咨各省並奉達冰案諒蒙鑒及

復閩丹初

二十三二十六日肅呈五十六七兩號信此時計已入鑒二十七日接奉四十三號惠書猥以拙書聯幅過承獎借感慚交並弟日來感冒怯寒畏風明知表虛而又不能不服疏散之劑日坐煖室料理案牘靜攝數日當可就痊各事謹爲條復一趙守七八兩批之糧已爲收清慰甚慰甚該守昨日來省稟

到因小病未經接見俟再來見當諭令赴尊處清算帳目然後
再行回省

一汝局存糧近二萬包現經我公發去駝隻較爲踴躍聞之欣
慰無已臘底完事不爲遲也

一許翁先生榮澤來信當卽寄呈弟復信挽留並達公雅意其
信託閻軒中丞轉遞如尙在汴不識許翁肯返旆否俟得回書
再行布達

一豫省存道口小米前經函懇涂朗軒中丞借運迄今未接回
書惟昨接德州崧鎮青觀察來書言必趕封河前將糧提前舟
運道口如做得似不必輾轉借兌致多周折鼎丞觀察二十

六日啟程十一月初十必可到德州情形如何必有信至再爲詳布

一新漕運路前信已詳請公裁定卽當行文飭辦冬令路乾正暢運之時一切須早下手方免遲誤獲鹿局張守請派員更替已允所請改派新過班道員吳道其復前往接辦倘能廣覓腳力此路一暢則運事較有起色

一各處種麥牽算已有五成尙不爲少此事所關甚大若田地拋荒縱遇天時亦屬無益倘明年麥秋大熟則諸事易於著手矣

致閩丹初

二十八日遞五十八號書諒蒙青鑒王曉巖給練奏以山西賑糧委積獲鹿什貼大半霉變並放賑參差等語欽奉 廷旨飭查另備公牘奉達惟查獲鹿局承運糧石最多因夏間山漲間阻腳力短少不免遲滯然四處設法廣覓騾腳隨時挽運尙無剋扣需索情弊亦非委員不能得力至積糧處所交夏之先已飭該局搭蓋廠棚妥爲儲放當據稟報搭齊尙無霉變至沿途雨濕因而鬱蒸在所不免月前該局委員張守稟請派員交替已允所請改派吳道其復前往接辦現當駝隻出廠自能日有起色什貼局所運各糧自四月後安丞頤接辦以來皆係隨到隨運毫無儲積各州縣辦理賑務歷有定章惟救荒無善策斷

不敢遽信均能絲絲入扣然菊圃太史杏樵主政周厯稽查皆能破除情面來信所稱均尙核實刻已檄飭捐輸局詳細查明以便據實覆奏將來或由公處主稿或錫以教言由弟擬稿呈政統求示悉是禱合肥相國處已分函奉致矣道口借糧一事頃接閩軒中丞回信允撥二萬石但其欲令晉交還折價每石四兩恐亦無此力量尙須與之函商仍以米完米否則以不借爲長策容與總局商定再行奉聞不識能俯允否

致閩丹初

十三日遞六十三號信不識已登籤閣否王鼎丞觀察於保陽稟謁合肥相國之後卽行東下此時可抵德州糧道崧鎮青觀

察函來允爲趕辦指日即可開幫而運費所短過鉅專望捐輸
恐不足恃昨於十七日會列台銜奏懇 聖恩飭撥江蘇等九
省協濟銀五十萬兩以充運費明知各省亦在爲難然較晉省
情形稍勝倘蒙 恩旨允准各鄰疆復能體念晉災如數籌解
庶可竣此一簣之功再三之瀆無厭之求自覺顏赧然值此時
勢亦出於萬不獲已也原稿錄呈奉請鑒核絳縣劉令勘查東
灘一路能否利運不識已稟復台端否一俟劉令稟覆如在可
行卽於橫水設局以利轉輸節過大雪尙無雪意南路一帶此
時亦盼雪澤否便乞示下是荷

復閻丹初

日久未奉教言正深馳系適披四十五號手告稍慰積思盡躬
不適此時想已霍然藥餌之投極宜慎重補劑散劑各有所偏
稍不相投反易致疾陳希夷先生十八法最能舒動筋骨老年
人行之尤爲合宜弟行之有年頗覺有效但苦不能無間斷篋
中存有刻本特檢出奉上請試行之使微微汗出便覺徧體舒
暢行之既久自能有益也諸事謹爲條復

一運城已開粥廠諸勞我公籌畫欣慰良深此間粥廠未撤交
冬後人數更多諸尙安靜

一獲鹿什貼存糧近以駱駝大旺指日可以掃數昨函催鼎丞
趕撥東漕運赴獲鹿以免停腳待糧情形瞬息不同未能執一

而論王給練之疏俟局中查覆卽當具奏也

一橫水設局必須待劉令查覆方能辦理應用委員已商請雲
蓉靜諸公定議開春汝州茅津撤局得力之員當再調辦別局
之事統容後布

一稚璜宮保勇於任事疆臣之傑出者中外同深欽佩此次查
辦之案於稚翁決無妨礙近時疆吏爲歸怨之府人人指摘動
輒獲咎以合肥相國之勲望尙不免自處於憂疑如弟之迂庸
濫廁其間能不時用惴惴乎近聞粵邊多警新疆亦有反復之
信時艱至此可謂極矣此間請協一疏甫發會逢其適不無隔
礙爲之奈何

一稷山王懋庚當此之時勸捐修署而散放麥種又諸未覈實
謬妄可知承擬疏稿極爲公允已飭密繕隨月指出去委署一
層亦囑蓉舫選派剋期馳往杏樵主政信已另致復矣河津事
更望詳查見示是禱趙守早經啟程應已抵運日來晴朗毫無
雪意盼澤甚殷元旦賀摺公文印花請卽檢寄

復閻丹初

昨布六十六號信諒已登覽頃奉四十六號惠函祇聆種切盡
躬不適至系鄙懷節候嚴寒諸望慎衛弟感冒迄未大痊近以
感風頭痛作劇而時事日艱財用日絀此心無一刻甯靜諸事
謹爲條復

一稷山參案已詳前函連日料理月摺一俟繕就卽當一並拜發另單所開各節已遵示辦會札稿飭解絳兩牧確查容再咨達冰案

一應解還陝省糶價既經我公備具咨批委弁解往至慰至慰容致函文卿中丞道謝

一部款已領回除截留獲鹿等處運費外餘款悉數解省頃與蓉舫方伯商明提三萬金解呈尊處以備指撥之用同善堂並運庫存款亦請就近提用是禱

一獲鹿什貼運事較暢已分備函牘催取東漕以便接續趲運道口一路舊糧亦竣如運河尙可行舟卽可趁此運濟倘已封

河又須待至來春方能開運農忙腳少諸又爲難事機之不順
往往如此徒深焦灼

一菊訐杏三公獎事公意既擬從緩容再商辦其餘各員從事
年餘備受艱苦實不能不稍示獎勵以鼓其氣弟現將勞績最
著品行著實者酌保二三十人所請不過升銜並補缺後升階
未由捐輸局上詳會列台銜隨月摺拜發菊訐杏三公正人君
子一心爲國爲民原不以此爲意而在各員斷不能如菊訐
杏三公之用心非此不足以資激勵且此番辦賑辦運在事官
紳不下千餘員亦不能不酌保一二成必須分案辦理今先擇
尤保出一單將來再行次第彙案則人數分而見少尊處應獎

各紳即可歸入下案列保

一昔年軍事胡文忠時時汲引人才故能成此勲業底定東南文正公亦如文忠之用心藉收得人之效當時部章未嚴諸事稍有實際近則處處示以限制海運河工雖稍勝於尋常勞績然充其量祇能保升銜升階不准保過班稍不合例卽奉 特旨允准亦必由部議駁概不能得優保也

一濟南黃太守有無加銜容詢明再行核獎但各省勸捐人數過多易致遺漏前已咨請各由本省核獎如各省有函牘請由晉省辦理者方爲具奏庶免重複舛錯之弊

一丁雨生中丞來牘以惠潮嘉道張壽銓觀察在潮屬勸捐集

數至三十餘萬元之多囑由晉奏保請旨擢用合肥相國函來亦經道及已具摺會奏矣印花公文已收到致周丁兩太守函已轉交並告知一切令卽詳細呈復戈什因其在轅奔走已酌補數人如續有缺出自當次第揀補各予實缺以昭公允

致李筱帥

晉省自遭災以來疊蒙鄰誼股肱至周極渥感佩良深惟年復一年依然荒歉農功無望不克自謀而地丁錢糧多半蠲免進款毫無初意向望北路收成或可稍資挹注不料重陽雨雪遂致全境告災殘喘之民何以堪此不得不籲懇天恩截漕撥帑幸蒙聖明洞察賞給東漕十二萬石以備冬春賑需此

逾格鴻施實爲曠古所未有也但晉省四面皆山不通舟楫轉輸之苦百倍於他省加以大祲之後牲畜倒斃一空非出重資無人應募統計十二萬石東漕數千里陸運來晉輾轉分撥災區必須運費百餘萬金方能敷用除蒙 發部款二十萬金業已請領不敷尙多國荃與丹初星使日夜焦慮莫展一籌若不廣爲籲告必致糧屯境外民死境中何以上廣 皇仁下保民命素稔大君子以濟世爲心從前之普救眾生固已仁慈廣被原不敢再作無厭之求無如時事多違祇得赧顏瀆懇務求憫其困苦迅賜將前撥各餉尾數迅爲籌解以救垂斃之民弟仰沐鴻施得免貽誤感激尤深從此得竣全功災黎洽再生之慶

皆出自仁人之所賜也恃愛奉瀆諸乞鑒原統望速沛恩膏以蘇涸魴幸甚禱甚曷勝翹盼之至

致邵汴生中丞

頃據劉瑞雲正郎在此談及漢口茶商和生祥有捐晉豫賑銀一款原以樂善好施出於誠信晉省當萬分窘阨不得不藉此涓滴之助以救窮黎惟該商號因湘鄉蕭輝堂之子有欠該號舊帳千金明知無著始有捐賑之舉迨奉文催取以致蕭輝堂羈押湘鄉衰頹情形行將就斃聞之惻然查賑捐原屬善舉意在救民若稍有抑勒株連則無益於此已有損於彼於心殊抱不安同一民也何忍岐視但原捐之案或在津門弟處未能深

悉用特函懇台端俯賜飭縣查明如果和生祥有力呈繳卽令
備繳以遂其好善之心萬不可格外株連致他人先受拘執之
苦大君子遇事循名核實定能委曲成全曷勝感禱

致瑞睦菴

昨奉手函承囑催解右衛欠餉並兵米等項當經具復諒達典
籤頃復與方伯籌商各州縣欠解過多應如何著落勒追查明
辦理茲由方伯查明光緒三年以前民欠米豆一免於 恩詔
再免於災荒無從徵解惟有本年米豆卽當嚴飭該府督率各
州縣上緊催收以供兵食一面將應發兵餉趕緊挪款籌解藉
濟要需至大朔兩府屬額徵米豆自嚴定處分以後總未能年

清年款並不按年奏銷前經閣下奏明當已檄飭查明造報究竟民欠若干蠲免若干豁免若干一俟到來即可擬辦惟思官經數任事故疊出徒令現任者獨受其累既覺向隅而於事亦無所益弟與方伯再四熟籌意欲寬其既往則自光緒五年以後即可按年奏銷如有不足分數者照地丁錢糧處分開參似覺較有實際不識尊意以爲何如尙祈裁覆是禱

復陳俊丞

頃披手翰辱承關愛殷殷至深感泐盡躬不適此時定已霍然節候嚴寒起居諸望慎衛殊系遠懷晉地浩劫未銷災狀又見處此弩末之勢時有餽覆之譏幸蒙 天恩發給漕米而式帥

中丞來信亦復注念殷殷允卽提前趕辦刻下孟符鼎丞兩觀察想可次第到東稟商一切但望早日開幫以資冬賑是盼至協餉之求現實未便啟齒惟此番運費所短過鉅不得不望鄰省惠濟務祈閣下於晉謁時代爲陳懇倘蒙俯允協撥則感沐式帥與執事厚惠益無涯涘矣崧鎮青觀察宏濟時艱晉疆受福容卽將其勞績切實陳奏懇 恩賞給二品頂戴俟拜摺後再行奉陳傅星源都轉獎案由東省徑請極好緣弟月前奏請將各省辦理賑捐出力人員援照海運河工從優給獎並請各省查明奏請奉 旨明發昨已一體咨達若照此案將捐數並其勸辦勞績一並聲敘指請升銜更爲合例並希轉致是禱弟

日來感冒近始痊可而以運事艱難款無所出殊深焦慮耳式帥暨紫垣方伯處乞爲代陳款曲不另致函

復李中堂

頃奉九月二十七日大咨並披賜簡承示荊州府倪豹岑太守捐助晉賑請獎一案應由晉融銷銀一千四百十兩此等款目最易疏忽遺漏仰蒙盡畫周詳隨時關照感泐莫名當飭捐輸局另立一冊凡遇此等款目隨時登記將來彙案造報卽當一並作爲收款設法融銷以免遺漏原稿謹敬書奏另由公牘奉覆矣汪司成請將囤糧變價一疏刻與閩星使商明將晉省現在不能糶賣情形據實覆陳不日卽可拜發容卽鈔稿咨呈奉

求鈞核新撥東漕亟須派員赴東承運晉中苦無員可派祇得
令道口局丁道彝綬帶同各員前往並函懇文式巖中丞暨崧
鎮青觀察提前趕辦但年內爲日無幾即使一切提速已在三
冬水涸之時道口舟運難資仍須先儘陸運頃間擬定以三萬
走獫鹿三萬走蘇曹六萬走道口仍各以三萬分清化洛陽兩
路此數路運務均不甚暢而洛陽尤甚然爲地勢所限更不能
別闢門徑也蘇曹館陶兩處前蒙中堂飭派戴令夏參將辦理
一切均資得力此次起運新漕仍擬借重戴令等接辦務求檄
飭遵照俾臻妥速晉省艱窘之餘更有乏才之患非蒙中堂處
處關顧一力維持早已貽羞隕越矣感頌之私豈復名言所能

罄哉

致李中堂

初八日肅遞寸函諒蒙崇鑒頃接樂山廉訪來信以海關一席
接手者爲鄭玉軒觀察樂山俟交卸後卽行北上晉賑捐務蒙
派平軒玉軒兩觀察接辦自必條理裕如玉軒觀察處已專函
通候矣並求代達微忱曷任感禱此番晉賑仰賴中堂提綱挈
領倡之於前各省聞風隨之於後故能籌捐撥協解濟源源濟
困扶危其敦鄰誼茲晉賑尙無了期而各省出力人員從事年
餘勤勞不著自應擇尤保獎以鼓其氣惟賑務向無請獎定章
大率倣局務捐輸辦理祇准保補缺後應升之階及虛銜加級

限制頗嚴恐不足以示鼓勵現經具疏陳懇援照海運河工核辦謹會列台銜暨丹初星使三銜會奏冀可上邀 俞允特先鈔稿附呈伏求鈞核前次轉餉來晉之衛游擊承煦代晉收發江廣蘇漕並各省捐購糧石辦理洎頭轉運糶務數逾三十萬石勤慎從公毫無貽誤可否仰乞恩施揀補一缺俾得及時自効又直隸候補同知桂本誠上年赴奉天勸捐經辦奉糧三萬石候補通判張振聚在獲鹿承辦轉運已歷年餘該二員爲晉出力奮勉有爲同通敘補向有定章國荃不知其班次名次未敢妄瀆應請中堂俯念該兩員勞績各給予拔委州縣優缺一次以示鼓勵特備公牘奉呈伏乞核准行司註冊則感沐生成

不獨該二員已也

致李中堂

十月望日肅函奉布諒蒙垂鑒半月以來諸事繁雜且以感冒未克致書至深歉仄鄭玉軒觀察已承檄委襄辦賑捐具徵中堂軫念災區無微不至感頌良深倣處昨亦備牘奉懇諒已達到矣頃奉 廷旨飭查王曉巖給練所奏山西賑糧委積獲鹿什貼等處大半霉變並放賑參差各節竊自晉省辦賑以來無時不以轉運艱難爲慮並蒙中堂代籌費却許多心力祇以天時地利人事三者俱不應手以致動多阻礙獲鹿局去冬糧運甚暢因該處爲入晉大路承運較多今夏山漲時發腳力極稀

遂多壅滯然四處廣覓腳力隨時挽運尙無剋扣需索諸弊亦非委員不能得力至積糧處所未交夏之先已飭該局搭蓋廠棚妥爲儲放當據稟報搭齊米糧未致霉變若沿途淋濕六七月之間片雲可以致雨實非人力所能施因而鬱蒸在所不免月前獲鹿委員張守稟請派員交替已派吳道其復前往接辦現當駝隻出廠之際設法招徠自能日有起色什貼局所運各糧因先派各員未能得力自安丞頤接辦以來未一月存糧運竣續至者係隨到隨運毫無儲積至各州縣辦理賑務歷有定章惟救荒無善策斷不敢遽信均能絲絲入扣然丹初星使親駐南路分派蒞圃太史杏樵主政周歷災區皆能破除情面來

信所稱均尙覈實似在可信筌亦隨時密查未能指出大弊刻已檄飭捐輸局逐款查明以便據實覆奏將來或由中堂主稿或求錫以教言統乞指示是禱鼎丞觀察已於前月二十六日啟行趨叩崇階之後再馳赴德州承辦糧運

致丁樂山

正封函間適奉鈞諭祇聆種切近日獲鹿什貼一路駝隻頗旺亟須趁此趕運昨日函促鼎丞先行開運若干發交獲鹿以免停腳待糧惠潮嘉道張壽銓觀察爲晉籌捐不遺餘力昨奉大牘擬卽敘奏明請破格錄用謹當會列台銜俟拜發後再行咨達星使如俟蜀事查畢尙須赴滇一行則爲日甚長急切未能

返節粵邊多警關外又有如此消息時艱一至於此聞之焦急
請協一疏已發會逢其適不無窒礙運費浩繁其將何以措手
樹軍已裁勇夫七百五十人自十二月起另爲編定此後仍當
酌度情形陸續裁汰已與練軍歸伍日期一並陳奏近日天氣
極寒晴朗毫無雪意盼望徒殷

復李菊圃

頃奉惠函知前寄文正全集已荷察收閣下清高絕俗不以利
祿縈心數十年所志所學久已共諒於天下後世固非俗士所
敢望其肩背也星使薦賢於朝與閣下平治當世之意相同至
於不用其言而榮其身實無是意來函譬諸餅餌與人言之過

矣免膏釐一層業已通飭並行總局照辦是奉行我公之言卽篤信純儒之道也惟於各州縣來稟批牘不敢操之過急以肇亂階並非重違尊悞禹惡旨酒明知後必有以酒亡國敗家者然不過惡之而已未嘗胥天下萬世之酒而去之也孟子闢楊墨明知楊墨大害於儒教闢之而已亦未嘗胥爲我兼愛之輩而盡戮之也韓公闢佛而唐以後之和尙更多天不以地有惡木而廢雨露之恩人不因病患隔噎而廢飲食之養假令披髮撻冠以救鄉鄰之鬪鬪垂涕泣而道越人彎弓之射人非失之僞卽失之愚此明者誠者所當戒也居今日而欲全省之人不喫鴉片雖有聖人之德而在天子之位亦不能強萬民以悉同

道光年間成案具在可以考核而知也藥釐小利未嘗愛惜早已行文停止至於陳奏以發難端非智小力小之人所能任此重大耳來示欲請星使代爲發之弟不敢勸亦不敢阻星使道有本末學有淵源實爲昭代識時務之第一流俊傑恐亦未忍以空言垂諸世宙已博美名而以不肖視中朝之彥也

復唐泉伯

頃奉惠函承示捐務情形具見壁畫精詳曷勝感佩兩湖均有水患地方情形亦未寬裕加以各局林立互相輕軒籌捐自匪易易閣下多方設法始克有成報解捐銀此間已見公牘不久當可到省藉濟急用李次青方伯籌辦晉捐頗爲出力情極可

感其少君事自當代爲設法惟所請兩層恐做不到俟接公牘再爲委婉批復好在各省勸捐出力人員已奏明准照海運河工章程核獎將來事竣當可彙案酌保以酬其勞祈預爲道達是禱兩批棉衣已到當卽分撥災區劭卿亦已安抵晉陽知念並及昨接部咨閣下所請各照已酌減頒發藍翎照晉局亦無所餘容卽飭取由公牘奉復

致勒少仲

頃閱邸報並准部咨上月二十一日欽奉 上諭戶部奏遵旨停止捐輸一摺肅清仕途自以停止捐納實職官階爲要該部業將京捐局銀捐等項及各項實官並常例未載條款火器營

章程均行停止卽著有捐省分各督撫將籌餉事例條款概行
停止以昭畫一一面將捐務趕緊清釐造冊報部所有照根空
照分別截清數目咨部繳納統限於本年五月悉數截止該督
撫等自能仰體朝廷澄清吏治之意不致輕聽局員率請展限
希圖延宕等因欽此查晉省開辦捐輸本爲湊集賑費而設現
在東漕十二萬石甫抵晉境各路轉運之費所需浩繁全恃一
綫捐項騰挪周轉俾得輶轡挽運救此春饑是捐輸一事在晉
省盼用之殷方慮招徠乏術如半途停辦將未運之糧驟然停
攔其以前借款無法歸還實有萬分不了之勢惟 廷意嚴切
斷不敢懇求展限有負 聖明求治苦心已定意遵 旨辦理

曰內當卽恭摺覆奏俾免遷延而昭畫一但細繹部咨冊報統以五月爲限則凡捐生已捐未完之案與夫報捐而未填照者似猶可及此三數月中趕緊催提完納分別報部無令延至五月限外有干挑駁是成全捐生之功名卽廣招捐款之實計想閣下智珠在握必能籌畫萬全爲晉省紓此迫切之急也至山鄉邊遠州縣其中亦不乏情殷報効之人並求切囑在事諸員分途勸辦務令曉然於實職官階此後之不可得五月以後報捐之不可行則轉相告述彼此歆動而不可遏雖僅此數月之限收項必有可觀濟民之急卽以拯我之危所謂事在一時而功施萬世者知大君子必肯竭此數月之力竟此解推義舉鄙

人惟有望雲九頓而已恃愛瀆陳無所逃罪屬在情迫諒荷鑒
原臨穎曷勝企盼惶歉之至

復瑞睦菴

昨修蕪覆諒達典籤頃奉還雲敬聆壹是所有積欠右衛米豆
等項尊意以清既往戒將來法宜兼盡具見精詳策畫纖悉無
遺竇所敬服益以第戒將來各州縣仍以既往不咎爲鑒尤而
效之疲玩依然如昨以致將來之戒亦屬徒勞其弊不難立見
弟與蓉舫方伯當時亦曾慮及此層然思積欠旣多則歷年必
久歷年旣久則官經數任不問可知從前之員類因事故而去
新任接手後清查交代難保無順情遷就者年來疊遭大禮各

州縣籌解現年款項尙形竭蹶前任積欠再無餘力補解似亦勢所當有若云何人所欠仍究何人則已散之四方清查殊非易易卽令咨追亦屬徒勞罔濟如以數任所欠歸咎一人恐向隅者多不足以昭平允且內有實係民欠 恩詔災荒之免錯雜其間諸多窒礙躊躇再四是以有寬其既往之議現在飭查之處尙未稟覆前來一俟詳到再與方伯熟籌應如何整頓之處再行函商台端總之貴部餉項弟實刻刻在心苟可設法有益尊需俾兵民懽臚鼓腹馬匹飽躍健蹄無貽閣下之憂此固弟所樂爲而亦願與方伯共爲者也

復楊石泉

前月下泮奉復一緘諒登籤閣承示我邑修復文塔一節並成
靜孝廉原函備聆種切客歲修復之議原以我公雅意培植故
思眾擎共舉以冀頓復舊觀迺函商各處僅蔣之純先生慨捐
千緡去歲來函已允囑梅仙世兄就在家中交兌想梅仙昆仲
必能繼志塔工旣興當可應用此項卽由舫仙福珠諸君就近
催齊可也彭紀南軍門允捐三百之數今春諒可匯到來函稱
已竭力相湊聞其光景亦實非有餘裕此處似難請益胡元亨
軍門自移節雲南之後賠累甚重來函稱實無力捐助亦不便
再行函致陽崇如都轉客歲復函並未有慷慨之意尊處致函
幸肯答應雖未說定數目想不徒託空言還祈閣下再行函達

劉毅齋京堂上年去信一次尙未回示毅帥素重慷慨或因邊務紛繁躬膺艱鉅顧全西方大局不暇及於一邑之事閣下囑爲加緘弟念毅帥馳驅萬里爲國爲民辛苦備嘗刻下建置防禦在在均須籌畫亦不忍以一邑修復之舉頻爲瑣瀆高明諒以爲然劉南雲方伯昆仲諾捐之數或可加增弟擬勸其捐一竿之數此處當可爲力也趙玉翁近在窘鄉來函辭甚婉切亦不可強以所難佛珠連臣樂爲義舉量力相助自是可必舍閒所捐千緡勉竭綿薄已囑小兒早爲交付以濟鳩工之需舫仙廉訪已付三百其二百諒必續爲交兌據邑中開來所擬經費捐單除規定捐數外合計不敷甚鉅現已興工在即捐款無

多必須月行設法籌措已函懇舫仙福珠諸君暫爲挪借如將來捐資不能敷用或照客歲重修文廟舊章於漕米項下略爲酌派以歸此款亦似可行尙祈鴻裁酌量賜覆爲禱李瑞蘭公祖弟已專函佈懇求其登高一呼倘能合眾力以觀厥成不必於漕米項下再爲酌派則幸甚矣

致沈幼帥

上年十二月間欽奉 上諭開捐納職於澄清吏治之道旣多窒礙於餉需亦多有名無實自應及時停止以肅政體著戶部及各省督撫通盤籌畫務將京捐局及各省捐局每年入捐若干詳細查明將此項作何支用之處設法籌款相抵一面奏明

停止捐輸等因欽此京捐局業已於去臘奏停將來情形如何未能深悉惟晉省開辦捐輸本非常局現正趕運東漕籌備賑款全賴此項挹注且一冬無雪直至除夕始獲寸霰未能優渥田疇荒廢民困難蘇並有早經收捐尚未核獎之案此時斷難遽請停止擬卽於正月杪專摺奏懇展緩數月但不識能否仰邀 俞充統俟隨後再行布陳惟當事諸君子遠籌晉賑勤事年餘賢勞備極前經會同合肥相國丹初星使奏准照河工海運章程核獎之案當經咨陳務求查明出力諸君銜名並應獎官階或由尊處主稿挈同賤銜入 告或擲交弟處會辦均無不可統乞示覆是禱

復李中堂

新正五日接奉賜函諸荷垂厯實深感篆承惠濟之十萬金已於除夕解到正年關緊逼之際得此遂如大旱甘霖欣戴不已覺銘椒頌柏未足抒此謝忱也練餉亦屬要需自應及早扣還藉副鈞意鼎丞籌運東漕極爲得手年內已運過八萬石有奇但使腳費足敷春半必可藏役昨鼎丞因局項已罄連函告急此間苦無以應遂飛牘懇商式帥就近撥款接濟尙不知能救涸轍否各處協款解者寥寥頻接覆音竟未有諾如季布者欲求如數如期必不可得念之殊增焦灼此間賑務本全仗中堂一力維持而樂山廉訪諸君子又皆仰體盡衷悉心裨助鄙人

一籌未展幾欲坐享其成昨將平軒訪梅兩觀察勞績據實陳奏非敢云酬聊以誌感耳李菊圃疊次來函總以嚴禁罌粟爲題以爲目下救荒之策無出於此其意誠善而徧禁煙館必涉騷擾其勢似不可行蓋託諸空言則易見諸實效則難也朗軒中丞請將各省賑捐全數解晉不爲無補弟現在已奉有停捐之旨京銅局聞已將撤似乎事在必行果爾則此舉仍成畫餅矣晉省臘底始得雪兩次均不滿寸急望祥雲渥沛普慶豐穰耳

復李中堂

頃奉立春日手札敬聆壹是諸叨垂注感荷尤深晉省賑運一

切需費尙鉅外省協款勢難全解又不能如期而至惟恃各省
辦捐源源接濟此外別無指望而各商號借項本約陸續歸還
至湘軍與樹軍月餉亦均隨時取給於此今一旦停捐正不知
百孔千瘡更從何處剋補思之束手無策昨奉台牘繼又接雲
楣諸公來函知此舉 朝廷已有定見決難中止當飭總局安
爲籌議僉稱晉省向無常捐此次係因災而設本有定限比他
省情形久暫不同緩急亦異現在賑務未竣需用浩繁卽將來
善後事宜亦非赤手空拳所能展布他省或能設法籌抵晉省
萬無補苴之術前經奏奉 俞旨展限一年茲請仍俟續限期
滿再行停止庶得此捐款猶可勉強支撐云云正飭具詳轉奏

間適又奉到鈞示始悉京銅局業經停收外省斷難久展自未
便仍執一年限期致形偏見斟酌再四擬但請展限數月至秋
再停未卜能否仰邀 宸允此實萬不獲已之苦衷想中堂與
捐局諸公必能共鑒也昨接鼎丞來函前項東漕不日即可掃
數目下尙有尾漕八萬餘石豆子二千數百石請趁此車驟輻
輳之際奏懇 天恩一並撥歸晉省以濟賑需並作籽種此項
運費卽儘東省欠款六萬金足以運至獲鹿於此地窮黎大有
裨益自屬可行之事昨日已具摺陳請矣 皇上軫卹災區有
加無已或不斥爲無厭之求晉省南路一帶自入新年連得寸
雪惟近省尙須沾潤但不知麥秋有幾分可望否耳

復李中堂

頃奉正月二十九日賜函敬悉種切停捐一事初意欲求酌展數月然以事關大局眾論僉同恐不能因晉省災務未完獨示區別所以遲遲未及具奏者正未敢首持異議致愆成命耳繼見部中覆奏奉旨各省捐輸卽著概行停止並統限五月內造冊報部不准延宕是此舉出自朝廷堅斷絕非模稜可比方當勵精圖治之日釐剔宿弊此爲權輿臣下所宜將順展限一層萬無冀倖或然之理因與司局籌商惟有一律遵辦更不求展以期仰體宸衷且慰中堂委曲關垂之意至如賑款支絀究應作何籌畫此時姑不遑計昨已備文行知各省捐

局一切悉符尊指所有正月以後收款均作爲從前報捐於限內清釐請獎或者此數月內輸將踴躍猶可藉資彌補但弩末雖強終亦不遠如天之福夏間二麥豐收賑務早竣尙能勉強支撐否則以後情形實難設想矣前請尾漕一摺昨午奉到批迴另有旨倘獲上邀 俞允所需運費尙無指款承飭津局續解捐銀十萬兩俾應急需感泐無似惟前蒙惠借之五萬金不知曾否扣還殊深懸系丹翁現駐河東顧盼風生遠近屏息昨趙守懷芳因轉運遲延立被彈劾比馳函緩頰業已無及仕路升沈原不足道此特出於意外耳茲永濟洪令又因錢糧一事爲其和盤托出來函於鄙人亦深致不滿之意謹鈔呈電察

此等題目倍難著筆昨已派員往查且看將來有無生發惟有相題命意而已

復閻丹初

初三日發六十八號信後卽奉賜札祇悉清恙漸就康復至慰遠懷惟過用心則耗血多談事則傷氣我輩處此艱難之會事多叢雜斷不能心無所思口無所言此靜養之難也各事謹爲條復

一新撥東漕昨接鼎丞來信已於冬月二十三日開車先運獲鹿一路道口之糧亦趁運河未凍多雇緯夫拉運年前可到三萬石委員等不至懸待其蘇曹一路卽以館陶等縣應兌之糧

撥給尤爲省事此鼎丞思慮精到處他人不及也丁孟符在道口養病仍令兼攝局事昨函致如糧到在即先儘清化運翼城一路撥發東灘正在流凌舟行不易應俟委員查覆再辦橫水設局亦以東灘能運不能運爲斷

一九省協濟之疏已奉 俞允當卽備函諄懇各省各省多不寬裕且有 陵工甘餉恐未必能分濟及晉然舍此無法祇得赧顏求助卽荷垂憐亦難速至轉瞬年關款無所出現向合肥相國商借十萬金藉應急用已蒙允許約定明年正月以後從捐款內扣還不再奏明立案矣

一南路自難再請停考俟蒲解會稟至日再與西山學使相商

一清查荒地及紅簿串票兩事容告知方伯卽照議通飭不得其人立法無益洵爲的確得人二字殊不易也

一採辦牛馬指日可以進口分撥章程亦飭局妥擬矣

一趙守糧運之滯咎無可辭蒙公優容此後當知策勵亦教誨成全之意也

一劉子民既能得力請公酌定酬勞之法見示以便遵辦

一許菊杏三公事前奉手函亦以無恰當酬勞之法是以遲遲未發御史無保法此外加銜升階又恐太空記名則無論何項勞績皆不准保吏部著有定章不准保獎各條第一條也杏樵主政雖可保歸知府但部章以克復城池斬擒要逆方准保免

補海運河工章程不比軍務出力亦難邀必准也弟意擬援照合肥相國保吳清卿太史之例奏請破格擢用又恐與我公前奏略嫌重複不知可否統求指示遵行

一汝州糧運將竣至爲欣慰尊處有應敘各員祈開示將來或專案或彙案無不可也

一甯廣文修壺口河路一議原因河路至此必須陸地行舟十餘里向來拉船運貨有所謂大股頭者不無刁難阻閘之弊若能開通河路洵稱至便但以弟所聞壺口水溜極猛勢若建瓴眾流湧入壺口水勢冲激其高如山水氣激成白煙一縷十餘里外望之可見及到近處但見壺口水湧矗立如山不復見煙

氣矣舟行距壺口游上數里卽須攏岸起陸若任鼓櫂中流致與壺口相近卽難停泊瞬息之間被狂濤湧入口中不可復問矣船身破碎板片零星必厯一晝夜始能仍從壺口泛出其深可知該處兩岸皆山河身本不甚寬夏日盛漲水至山根融成一片斷難別闢支河冬日水落歸槽雖有隙地又屆冰橋抵結時矣若就壺口之旁開深河路石底不但工程浩大人力難施且恐終爲壺口水勢所逼仍不免有傾覆之虞惟其條議內有建侯軍門亦有此意等語或者建侯在彼最久別有善法已遵示咨詢矣冬至後仍無雪意盼澤甚殷擬日內設壇虔伸祈禱

復閻丹初

十一日遞七十一號函並附吉榮兩案摺片並許庭先生來信諒登台鑒項奉五十號惠函祇悉種切吉榮之案十四日過堂毫無異議已遵照畫供俟奉環章卽當發繕年內斷趕辦不及或須俟開印後再發也諸謹條布

一鼎丞辦事諸臻妥協燈節前後清化必有糧可運如果暢行卽不走東灘亦可橫水一局原議以水牧辦理且俟薛令稟復再議

一所解部款三萬金前函奉復請公留爲蒲解各屬赴翼城等局領糧運費茲承示同善堂及道庫年杪可有十八萬金專作運費已由尊處行文飭平陽局將省撥三萬金截留備用當已

告知雲階蓉舫靜盦諸公矣

一蔣大使期滿甄別已行文寄題飭河東道就近考試弟處卽可加考出奏惟向章須月備履歷冊咨部仍請飭令該員照備稟送藩司核轉卽可據詳咨部也

一杏樵主政來信言格殺之案往往尋釁復仇易致拖累現已照辦通飭不日卽可發行鄉甯控案又勞杏樵跋涉諸抱不安一南運各員保案明年請我公主稿摺同賤銜拜發其保舉一切章程近頗繁碎尊處如無底案容再鈔送戈什諸能仰體德意甚爲難得續有缺出自當揀補以酬其勞如有勞績較著者南運案內可以酌保千把以下向用咨案不必奏獎統求酌之

此間亦未得雪定十六七八日設壇祈禱近日辦理計典並清理年終積牘冬日苦短頗覺不遑

致閻丹初

二十二日遞七十三號信想已早蒙台鑒頃奉五十一號惠函祇悉種切年關伊邇公事紛至沓來勉爲支持殊苦碌碌承公鞭策之詞彌用愧忤諸謹條復

一入冬無雪大爲憂念聞省北之神池省南之平遙各得雪寸餘此亦慰情勝無於來年未必有濟至蒲解一帶旣經明公齋心動念想精誠感召日內當獲澍應矣

一本年東漕據鼎丞觀察來函獲鹿一路年內約可運到三萬

辦理至爲得手其清化一路因運河水凍不能開兌現由幫官採購交兌每日不過數十石似此光景恐到開河後方能踴躍一垣曲水運有無窒礙刻尙不敢定議其橫水設局或且存此一說惟蒲解赴翼領運稍遠昨經捐輸局議詳擬於安邑北相鎮設局卽派水牧之濂經理是否便利或仍應在運設局之處卽乞尊裁

一運庫暨同善堂糶款如來年三月可以湊足三十萬最爲可喜所有蒲解運費弟意仍求我公主持省中應發各局運項倘有可搜括卽不須動撥此款如計無復之屆時再行奉商尊處辦理想浮圖已屆合尖我公必不吝此一簣之力也一清化局

東漕將來不過運到三萬而澤州所屬尙須截留似到翼尙不能足三萬公意擬先將蒲解被災州縣預先定一總數俾官民知有所守甚善甚善弟意卽請公先就三萬之數預爲勻撥蒲解所屬如翼局不足三萬再以平局相益設三萬猶嫌不敷隨後乞公指示爲要

一同善堂報銷煩絮在他人綜核必以爲苦公心計妙天下區區數目豈足溷公神智漕運一事惟有請公一力主持想卓道張丞無不樂受鞭策似不須由弟札飭反致兩歧

一南運保案於春仲辦理亦未爲晚屆時請椽筆定稿會挈賤名入告杏樵三君子應如何酬勲之處並由尊處酌奪

一南園侍御書無論墨蹟石刻容卽託湘友代覓如有所得卽以奉寄

一討庭先生信已收到承寄示稚帥暨薛季懷來書爲之懌懌蓋天下是非毀譽所淆亂者久矣惟獨立不惑君子以堅忍持之千秋萬歲光景常新腐鼠滋味何足爲有無耶原信並以奉繳請察入爲荷

復閻丹初

初六日遞二號信諒蒙古察頃奉初二日第一號惠緘祇聆種切運城一帶於元日得雪三寸當歲序之方新幸同雲之沛澤是皆由公精誠感召而至欣謝無量南園先生墨蹟固可寶貴

然豈足報塞公之苦心惟旣已爲可弟自當趕緊物色用慰厚望特施者瓊瑤而報者木瓜不免爲詩人所笑耳諸謹條復

一運庫存項弟意悉以畱備尊用蓋不忍以災重之區更窘公以不足也茲因清化局費告竭而撥三萬並以翼城設局而撥二萬我公濟民之心可爲每飯不忘者矣曷勝感謝之至

一道口與蘇漕各運三萬其道口三萬專運清化徑走翼城業已行知聶令嗣因鼎丞觀察來書以衛河水凍運兌諸多不便擬以全力專注獲鹿改運八萬其清化一路擬改二萬似當此農閒腳多之際由清而翼或尙不至過難倘壅滯可虞卽另闢治成一路由垣曲之東灘卸載稍分清化之力更好俟局詳定

原缺

不虞夏秋之際旱澇交乘歲仍大歉刻下嗷鴻徧野待哺如前
其勢萬難停賑幸已續撥東漕十餘萬石勉強可敷至來春第
道遠費鉅一時不能飛挽入境計不獲已仍求助各省再籌協
款以資運價若此項銀兩能陸續解到趕將漕糧運竣以之分
濟各路災黎庶有亨乎然自入冬以來三農望雪甚殷乃現屆
臘尾寸霰不作來歲麥秋又不可恃視此情形杞人之憂正未
有艾在 朝廷發帑截漕費以數百萬計恩至厚矣澤至深矣
今剩此子遺猶不能保其不爲溝中之瘠捫心自問負疚良深
乃閣下遽以先哲事業相期許是真刻畫無鹽徒令顏汗耳本
省捐輸所得不過蹄涔之潤全恃外省集腋拯此枯鱗承喆嗣

代辦珂里分局甚愜鄙懷以賢喬梓鄉望素孚今又不辭勞勩
多方勸辦固宜眾情踴躍如此聞已收有成數裨益非淺至爲
感佩